



CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
NOV 22 1932

~~5421/831~~

T 5403/83







陽彭直上先生鑒定

公諱基字伯溫恬蒼青田人

太師劉文成公集

恬芝南田賦
藏板

補刻明太師誠意伯劉文成公集序
余宰青邑行南出詣明太師劉文成公
祠瞻其遺像整冠再拜肅敬久之引其
後之為請生者數人與之語因索公全
集讀之集重錄於公齋之居歐江者
新刻本亦有誤者自十一卷至十八卷

補刻明太師誠意伯劉文成公集序

哈佛大學漢和
圖書館珍藏印

補刻明太師誠意伯劉文成公集序

余宰青邑行南田詣明太師劉文成公

祠瞻其遺像整冠再拜肅敬久之引其

後之爲諸生者數人與之語因索公全

集讀之集重鈔於公齋之居甌江者簡

新矣然尚有恨者自十一卷至十八卷

俱闕如夫公之集流布海內藏書家多有之茲邑爲公桑梓地反不獲見其全何以備是邦文獻哉詢之耆師宿儒云甌江有藏茂鈔本甚珍之今年春以公事赴甌借而錄之以呈觀察芮公太守曹公咸躍然喜謂余盍補鈔之以成完璧余唯唯承命遂出一歲俸仍以授甌江賢裔俾付梓人督成之凡閱五月計卷八頁二百有餘或他雜著尚有缺者而公之詩文已無遺憾矣余惟公之文深遠浩博公之詩瑰瑋奇麗求之元季固當在伯兩玉山鐵崖諸公先卽擬之明初亦未嘗在潛溪清江季迪諸公後豈非著作家之泰山喬嶽乎哉况其長

歌短詠以宣光望順帝以李郭期當時
將相涕泗悲號不啻言之繁詞之複卽
郁離子一集類多假托其詞以爲緯
之憂漆室女之歎江湖而憂廟廊庶幾
少陵每飯不忘之意及乎江淮塗炭民
歎瞻烏出佐明祖成大勳其典冊碑銘
紀功頌德鴻篇乃反不及往者什一二
則公之志業不又可論世而知哉錢旣
竣遂書數語於前其雜著散軼俟廣搜
之以成別集而附其後至公之出處功
業載在史冊不具論皆

皇清雍正正八年庚戌歲嘉平月之朔

賜進士出身

特授文林郎浙江處州府青田縣知縣加

一級紀錄二次丙午科浙闈同考官
今陞吏部文選清吏司主事黔南後
學萬里拜手題



劉文成公文集後序

予自束髮就傅時輒聞諸先達談及前明

開創伊始有名世劉文成公為之佐理言

聽計從用成大勳公諱基字伯溫浙江青

田人也比長讀明紀知公之才婉美伊呂

獨惜其文章風旨不少概見歲乙丑恭膺

馬序一

簡命出宰青邑乃得公之文集讀之敲金戛
玉骨秀神清淵然而與皎然而明如聞鈞
天之奏廣陵之曲益心切嚮往焉欲多購
數卷以公同好詢及公之後裔世居南田
家有藏板有劉生名沛者公之嫡孫十四
代孫也仰慕祖德此集之重浸增補其間
存沒隱見俱能悉其原委因索序于余余
竊惟公之勲業垂史冊而昭天壤公之著
述遍海內而傳奕禩青邑為公桑梓地廟
墓在焉苗裔繁焉則此集板刻自應子青
以備是邦文獻今板藏南田嫡孫其存沒
隱見之由誠宜詳著簡端以昭來茲集之
始刻不可考至明季一刻于處郡守林公
一刻於處郡人何公悉稱善本迨遭一變


之後邑人罕有存者即南田世冑亦無完
本矣至康熙丁亥有甌郡江心寺僧名月
川者公之嫡裔也因明末孔昭公南遁入
海流落江心八空門殆亦有所托而逃焉
者年臻髫髻囊有素蓄慨然搜刻是集極
力覓尋幸獲郡伯林公原本依其卷次而
釐訂之此集乃復見于世逾年工未竣而
月川又已溘逝所遺之板遂浸沒于甌而
青色仍無藏板至雍正庚戌前邑令萬公
訪之耆宿知甌江有鈔本借錄而補鏤之
遂成全璧然集雖全而板仍留于南田分
派劉宗煥之家後又轉寄他姓終不為南
田嫡派有也癸亥歲劉生不吝厚貲始贖
歸南田以昭世守以光先業而公之故物

乃歸故土矣夫以公之才猷固不必以文辭顯然後世想公之模範慕公之學業者讀其文章風骨慨然想見其為人亦可感發而無起則是集又烏可以不備不傳乎哉余既喜公之文集青有藏板而更深嘉劉生之不忘先德也故綜其原委而樂為之序省

乾隆拾壹年歲次丙寅秋柒月朔

賜進士出身文林郎署浙江處州府青田縣事

特授嚴州府桐廬縣東魯高居寧拜書



誠意伯劉文成公文集序

余弱齡侍家長者談國初翊運諸名臣輒凝聽之憬然有懷焉長而宦遊四方竊願表揚先哲博綜其遺文頗喜善本若宋文憲公諸集海內翻刻者幾刻益良劉宋匹也其文獨刻於枯蒼歲久字訛舛板又漫漶莫或新之者余奉命按行東浙以辦香謁公祠下詢遺文僅覩此編愀而歎曰嗟乎逝將以功業掩文章耶何善本之寡也屬太守陳君烈萃諸文學重加訂正付於良梓俾海內同好者共焉序曰

高皇帝呼劉伯溫爲吾子房蓋開國首功云然子房自二三籌畫之外其言論風旨不少槩見而公著書之多乃若此何

哉說者謂子房授書黃石舒卷如龍雖神機時出竟善藏其
用塞兌閉門不迫不應爲得老氏之術公剛毅慷慨持大節
留心經濟遇真主期以王道致太平卻小明王御座諸正
論義形於色危行危言

高皇帝天威嚴重惟公抗辭不以利害怵其中振綱紀斥姦
慝雖李善長亦忌譖之况胡惟庸乎考公履歷豈孔氏所謂
以道事君者非耶漢文成侯我

明文成公上下相符合特帷幄中諸籌畫耳公守孔氏家法
多著書貽後世不若子房之秘密宜也夫其玄機洞鑒神啓
於中天之所授以輔開天之聖妙筭所紆乘時驚發載在國

史者既與雲漢同其昭回其諸喻志說觀物之篇憤世之詞

羈旅之幽思薄遊之清况與夫廟堂之所述作士大夫之所

應酬又浩浩如江河欽欽如山嶽醺如惠風朗如景星麗如

卿雲無意擬古而神情悠邈才氣雄豪體裁音節如庖丁解

牛靡不中於自然者公之文章與其功業並傳無斃恢恢乎

有餘芳矣余受觀風之寄光昭往訓樹之風聲爲世型範何

敢讓哉或曰留侯子辟疆方少年能策制諸呂計安劉氏而

公仲子環不忌嗣君卒全大節茲亦兩文成胤嗣之相似者

劉氏子孫當世世敬修也因附及之

隆慶壬申仲春望日巡按浙江監察御史後學豫章謝廷傑

頓首拜書

寫情集序

寫情集者誠意伯栝蒼劉先生六引三調之清唱四上九成之至音也先生生於元季蚤蘊伊呂之志遭時變更命世之才沉於下僚浩然之氣阨於不用因著書立言以俟知者其經濟之大則垂諸郁離子其詩文之盛則播爲覆瓿集風流文彩英餘陽春白雪雅調則發泄於長短句也或憤其言之不聽或鬱乎志之弗舒感四時景物託風月情懷皆所以寫其憂世拯民之心故名之曰寫情集釐爲四卷其詞藻絢爛慷慨激烈盎然而春溫肅然而秋清靡不得其性情之正焉

宜其遇知

聖王君臣同心撥亂世反之治以輔成大一統之業垂憲於萬世也先生當是之時深知天命之有在其蓋世之姿雄偉之志用天下國家之心得不發爲千彙萬狀之奇而龍翔虎躍也嗚呼千載之前千載之後英邁挺卓能幾人哉今先生旣薨其仲子仲璟與其長孫薦謀以是編鉞梓垂遠以蕃於先生辱平昔之好命爲之序顧蕃愚陋何敢措詞追慕高風其容讓乎昔

洪武十三年歲在庚申春正月上澣永嘉儒學訓導安固紫
華山葉蕃叔昌序

郁離子序

古之君子學足以開物成務道足以經綸大經必思任天下之重而不私以善其身故其得君措於用也秩之爲禮宣之爲樂布之爲紀綱法度施之爲政刑文明之治洽乎四海流澤被於無窮此奚特假言以自見哉及其後也雖孔子之聖可大有爲而猶不免述作以傳道况其下乎然則必假夫文以自見者蓋君子之不得已焉耳矣君子以爲學旣不獲措諸設施道不行於天下其所抱負經畫可以文明治世者獨得筆之方冊垂示千百載之下知而好者或推以行是亦吾澤所及其志豈不爲可尚矣夫然自秦漢而降能言之士何限非不欲如前所云也率多滯於異端失於僞巧詭而不正駁而不純弗畔夫道固鮮人苟用之以求致治殆猶適燕而南其轅乎闡大地之隱發物理之微究人事之變喻焉而當辨焉而彰簡而嚴博而切反覆以盡乎古今懇到以中乎要會不襲履陳腐而於聖賢之道若合符節無一不可宜於行近世以來未有如郁離子之善者也夫郁郁文也明兩離也郁離者文明之謂也非所以自號其意謂天下後世若用斯言必可底文明之治耳嗚呼此寧虛語哉從善少嘗受讀歎其義趣幽蹟岐緒浩穰或引而不發或指近而歸遠懵乎莫測其所以然逮閱之之久觸類而求然後稍得窺夫涯涘竊

言意作集
譬諸醫師之籠一藥必治一病玉石草木禽獸之屬皆可以
已疾延年無長物也此其爲書所以深得古君子立言之旨
使其得君而措於用其文明之治益天下後世爲不薄詎止
度越諸子而已耶是書爲誠意伯劉先生所著先生嘗自任
以天下之重於經綸之道開物成務之學素所畜有曾以其
槩翊當今之運輔 大明之業昭昭矣存諸方冊者故御史
中丞龍泉章公雖已刊置鄉塾然未盛行於世先生之子仲
璟與其兄之子薦謀重刻以傳嗟乎茲豈一家得而私之者
哉惜爲敘其大略俾貽方來云爾翰林國史院編修官諸生
吳從善序

翊運錄序

天生聖人開基啓運必生命世之臣以爲之輔如伊摯於商
呂望於周張良於漢皆翊其君建皇極行王道以致太平以
開景運以制禮樂動爲世軌也行爲世則也黼黻河漢也昭
回日星也衣被草木也後世畏之如雷震望之如神明禁其
力而不敢肆故其君端拱無爲飈行霆驅莫之誰何我朝
太祖聖神文武欽明啓運俊德成功統天大孝高皇帝以天
縱之聖除元季之亂不數年間遂開六合奄有萬國榮光貫
日王氣浮淮躋斯民於春臺之上熙熙皞皞玉燭調泰階平
雖曰虓虎熊貔柱國之臣爲之宣力然亦藉明良豪傑與圖

治功也方天造草昧定都建康西有僞漢東有僞吳長艦大艦日夕相搪擊天下未知所嚮有若開國翊運守正文臣資善大夫御史中丞兼弘文館學士太子贊善大夫護軍誠意伯劉先生者沉幾先物識真主遂委身而服事太祖敬而信之用其宏謀西平江漢東定吳會天下大勢固已定矣於是席捲中原群雄歸命混一四海大抵皆先生之策也今觀御書詔誥之推獎國計事幾之商榷詞命往復彌縫叅贊千載一遇雖伊摯呂望張良之卓越亦不過於先生矣先生真豪傑之士哉年愈高智愈明功愈大德愈邵遂分爵土終始榮顯殷周以來一人而已先生恬蒼之青田人予忝爲同郡今年守職翰林其孫鴈等集其御書詔誥行狀事實等文名之曰翊運錄蓋取誥文開國翊運之語也請予序其首簡予謂先生之器識事功通於神明文章道德衣被後世溥天下皆稱道之而先生不自以爲至是則先生之所至世之人未必能知之是錄也企太祖之知人善用賢也太祖之聖神文武同符於湯文也見先生之真識也見先生之宏謀也見先生之勲業也聖明會遇自古爲難乃獨於今見之先生之子中奉大夫江西布政使司右叅政又能繼其後結知太祖以廉能見褒於制誥可謂耀於前而光於後矣後之子孫尚亦繼繼承承深惟祖宗積德創業之不易紹隆先範

詩意仙文集
以副朝廷優禮功臣之意將見與是錄同垂于千萬載之
不泯也

永樂二年龍集甲申夏四月中澣翰林學士奉議大夫兼修
國史同郡王景序

覆瓿集序

大明太祖高皇帝受天明命奠安四海二十年間殄僞漢殲
強吳汎掃弊端廓清寰宇復先王之疆理開萬世之太平是
雖熊羆貔虎之士相與竭股肱奮威武以佐神功抑亦贊襄
廟謨運籌帷幄之中有其人也若栝蒼劉先生伯溫真其人
乎先生諱基始以文學上謁於金陵知聖祖之克典神天

也卽委心聽命遂成鼎定之功累官太史令兼太子贊善大夫
歷御史中丞遷弘文館學士卒拜誠意伯蓋匹休伊呂者幾
二十年今旣九京不作後進之士景休風仰末照幸先生之
文章猶有存者耳先生之作有郁離子有春秋明經有犁眉
覆瓿諸集壽諸粹者久矣惟覆瓿一編未有序之者其孫刑
部照磨猶間以囑余嗟夫先生之心志於道先生之道著於
文人皆知先生見知當時者以其文而不知太祖高皇帝
知先生於儔人中者以其心人皆知先生事高皇帝能盡
其心又不知天以先生輔佐聖神肇建鴻圖者唯在於道然
則是編也將以五味之藏餼斯民於饑頓顛踣者也覆瓿云

乎哉先大父弘文館學士復仁公與先生俱以佐命顯余於
照磨爲通家子弟故不辭而序之如此云若夫先生翊戴之
績與先公俱有國史在茲不復也

宣德五年冬十月嘉議大夫工部右侍郎前翰林侍講兼修
國史吉水羅汝敬書

犁眉公集序

犁眉公集者開國功臣誠意伯劉先生既老所著之作故取
此以爲號云先生自少穎敏既長於書無所不讀凡天文地
理陰陽卜筮諸子百家之言莫不涉獵元末登第爲瑞之高
安縣山縣耆老有稍知天文術數之學者而其書甚具先生

召與之語其人曰公旣聰明絕人而器識宏遠當爲一代偉
人吾書盡以相付先生遂得究觀其說而領其要世亂棄官
家居泊我 太祖高皇帝渡江先生知 真主也應召輒出
佐興大業及其功成名遂引身而退卒以壽終而其術亦不
傳嗚呼公之出處進退比之子房豈不明白正大偉然大丈
夫之所爲哉予嘗觀於先生非惟其勛業冠絕前古而文章
亦足以垂世而莫之與並也是故其仁義積中發而爲言可
以方駕古人者則於郁離子見之傷今悼古牢籠百態可以
超邁當世者則於覆瓿集見之若夫優游閒雅托興微婉而
有以盡其自得之趣者則於是編見之其氣壯故其辭雄渾

而敦厚其學博故其辭深宏而奧密其志忠故其辭感激而
切直其行廉故其辭蠲潔而清勁吁古今之能以勛業文章
並顯於當時而垂耀於後世若先生者幾何人哉先生雖沒
而有不沒者存其在此也歟先生之孫爲刑部照磨名豹字
士行以才賢薦厚見稱於人是亦有以見故家文獻之足徵
也

宣德五年冬十一月之二日翰林侍讀學士奉訓大夫兼修
國史金陵李時勉書

重鈔誠意伯劉公文集序

富自童孺時卽聞有誠意伯劉公之勲烈爲開國宗臣之冠

筮仕以來求公之遺文而讀之乃得公平生所建立之詳夫
超世之蘊者厥振匪彝故峻其所樹嗇於菑者無厚畬自古
天下之事功未嘗不符於學術也公豪傑之才隆於帝授而
天人之秘洞之素深邁元末運沉於下察其志鬱而弗伸也
其謀浚而孔忤也其才積而困於無施也故得肆力於文焉
或時事之感激而洩憂憤之紆餘或機會之在前而痛鋪張
之失策證古例今有寓而諷之之意而開闔操縱皆經濟之
資焉大率施爲理而不失其宜權變精而馭之以正辭意剴
切如靈均之草澤行吟英銳奮發如博浪之椎未試一擊皆
可考也逮我太祖高皇帝龍興淮甸公識真主於異雲

映湖之日遂起而從之蓋懼中國之無統欲借權以立義也
方其進謁金陵一見如舊受心膂之寄掌帷幄之機殄漢殲
吳

廓清寰宇之功曠世而僅見偉矣哉於今爲烈
也予嘗爨考其行事當天下甫定之初首論滯獄倡立兵衛
居守按貴臣之侮法論相卜小犢之債轅辭封爵而不貪天
之功終身顯融而私產無寸益時贊密謀保全勲舊口不言
而人亦無知者臨終尤拳拳乎修德省刑之數語斯其道任
天下之重智鈎物理之玄謀入九地之深而勇懾萬夫之氣
所謂超世之學術著於文者鑿鑿乎親試之矣雖然公之神
在天下不死勲業聲光久而不磨固無賴乎文也但典籍存

庶幾可論其世傳之弗昭或病焉公文梓行久矣歲遠浸湮
字不復辨富承乏枯蒼典刑在目視篆之暇訂其譌落重加
編輯捐俸再鋟諸梓俾公孫指揮瑜等世守之使天下後世
亦知故家文獻之足徵也

正德己卯夏五月 賜進士中順大夫處州府知府後學
莆易林富謹序

重編誠意伯文集序

余觀載籍代有開創之君必有佐命之臣運籌定計應機料
敵稱豪雄矣而或歉於文學呈華炫奇開新啓昧稱儒碩矣
而無裨於武功兼此二長世不恆有其惟我國朝誠意伯劉

公者其人乎公諱基字伯溫浙之青田人有命世豪傑之才
遇 聖主杖策從之輒許以大計殄漢殲吳混一六合公密
贊之功在開平武寧之先灼灼可睹也而其文章議論或宣
於朝或藏於家大篇短章無慮千百種則與宋學士王待制
等夫 皇祖之興恢萬世帝王之故疆開一代文明之景運
當時文武佐命之勲可謂盛矣自今觀之傳世之文宋王號
爲最著二人者職專文學固其常耳開平武寧諸臣勞在宗
社澤及孫子世世誦功與國同休而傳世之文槩未之聞也
兼二者之長武功文治咸賴焉卒莫有並於公者讀其文論
其事功想見其人乃知聖主之生也不數名佐之生也亦不
數阿衡佐商厥有伊訓尚父造周且著丹書歷千百年而一
再見者公其庶幾矣哉公之文傳世久矣舊刻凡二十卷曰
翊運錄曰郁離子曰覆瓿集曰寫情集曰春秋明經曰犁肩
公集各就篇名雜陳無統觀者病之御史樊君按治畿內公
暇更定編次爲十有八卷先像贊行狀槩事業之全次御書
詔誥紀勲庸之大次頌表次郁離子揚文明之盛次序記至
詩歌載製作之詳統會以提要類分以便觀名曰重編誠意
伯文集刊成請余序余浙人也嘗謂公國朝元勲鄉邦典刑
文章與事功並著尤罕儷焉願附一言以廣其傳且以嘉樊
君之擇所嚮往也乃樂爲之序樊君名獻科縉雲人蓋公之

同郡人云

嘉靖丙辰夏五月 賜進士榮祿大夫少保兼太子太保禮部尚書武英殿大學士知制誥會典總裁餘姚李本撰

重刻誠意伯劉公文集後序

誠意伯劉公文集固枯一方文獻實為明百代文章勛業之宗儒先理學之統也刻自永樂初王太史景後凡三易梓矣歲久寢堙論次或盪海內學士大夫誦說睹慕公者每嗟咨焉嘉靖己未公鄉達斗山樊侍御嘗刻於北畿巡院東南修辭士人抄得觀視且經義刪遺似非全集隆慶壬申春豫章虹峰謝公持斧按兩浙丕崇正學風厲人文行部至枯握劉

公簡籍惻然曰集殘缺矣士君子有志用世明道舍是何所法程哉乃檄烈搜討遺文重手校而鋟焉公諸遠爾意甚渥也刻成授烈序諸末簡序曰烈自撮髮讀書卽跂嚮公勛業文章為古今殊絕人物恨不一至其地為之藻執奮感依馮茲猥以謏薄承乏公郡獲瞻儀刑章典復辱掛名文字中以自託於尚友豈疇昔之願哉夫天將開一代文明之治則必篤生名世之臣以應昌期邁會風雲翊主佐命贊謨決策撥亂返治輔成皇王之化未始不本之於道德文章道德文章精神心術之微也古之君子若伊尹於商呂望於周其阿衡鷹揚事業已定於莘野渭濱之時子房始遇沛公運籌決策

以成帝業亡一不酬孔明臥草廬與先主商推孫曹因蜀之
資以圖天下終身不易其言公天挺人豪鍾稟特異固伊呂
之亞子房孔明之儔也生丁元季阨塞抗憤則已有憂天下
致太平之意故撰著郁離覆瓿諸篇章言雖雄渾奧密閎辨
激壯體裁殊而據忠闡性則皆所以鋪擷其拯世救民之心
釀醞夫禮樂法制之教出入造化機變鬼神卒澤於道德仁
義之懿及其明炳物先識 真王起從而受心膂之寄柄帷
幄之籌殄漢殲吳撥亂成治 拍授諸虓虎熊貔柱石之臣威
高皇帝大一統之業滌舊圖新復還三代之治何其偉歟
嗟嗟樹開國之勛猷昭傳世之文章與古先豪傑兼休並顯
於千百世之後公蓋出有所為而生非無意者矣豈章句之
儒虛誦讀守空文罔效尺寸已哉是固烈之依憑嚮慕之私
也謹序

隆慶六年秋七月朔後學建安陳烈頓首書

重刻誠意伯劉公文集序 原序

青田文成劉公文集故有翊運錄一卷覆瓿集十四卷郁離
子四卷寫情集二卷犁眉公集二卷春秋明經二卷國初嘗
梓行而郡人翰林學士王公景章為之序正德中郡守莆田
林公刻置公里第嘉靖中余友人縉雲樊文叔乃類編之刻
于真定今侍御虬峯謝公按部括蒼修謁先生祠堂討論遺

文得里第本病其漶漫舛錯乃命郡守建安陳公依真定本
翻摹授梓余爲校正若干字梓成屬爲序序曰先生生在枯
蒼萬山中九盤之巔所謂深山大澤用物弘而取精多者也
然當五百之昌期輔真人以肇造籌帷帳而垂勳烈昭昭乎
若揭日月行天中可不謂見之行事哉何以文爲夫古昔聖
賢備具道德仁義之懿施于政教被及萬彙其禮樂章程莫
非文也惟窮而在下者不獲有所張設乃不得已而托之言
以寄其憂憤康濟之懷俟之後世或起而帥行之斯聖賢所
爲文辭也愚讀文成先生集多處窮憂世之深慨而深幸其
遇 聖神而興起也嘗槩其集有六善焉一日窮經以明義

二曰寓言以徵用三日遵養以俟時四曰憂世以舒抱五日
知命以樂全六曰遭逢之無間夫元綱不振四海土崩無父
無君視爲故事聖經明義千載或湮焉春秋成而亂賊懼此
義不由學者倚席不講之過也此窮經以明義也元運式微
務爲陵替撫狡寇而引非族言之者抵釁起弊末由痛心荼
毒於是乎卮言郁離比類旁通故三閭澤畔之吟離騷倦懇
之意也此寓言以徵用也豪傑颯起四海糜沸而時事倒置
寵賂肆章騏驥服箱木狻冠帶乃先生憤世疾邪每形歌什
寓意微詞託稱覆瓿莘野時辜於納溝扣角放歌于夜且由
斯義矣此遵養以俟時也祈招式誦冀訛王心里巷詠吟觀

風是不詩餘寄興取類寫情或亦有鑒吾衷乎此憂世以舒
抱也至於垂老見幾引身高逝璆琳戛擊以和天倪于是乎
稱之梨眉比跡赤松保厥終始斯爲全德此知命以樂全也
攷之己事隆準大度忍心菹醢畱侯色舉明哲乃彰藏弓請
苑百世而下有餘悲焉 高皇以來世懋延賞丁寧天語焜
燁龍章具在翊運篇中卽魚水交驩和自申錫又何以過此
遭逢之無間也或者曰青田文章掩於功業又曰動華並茂
無訾偏長而不知是非先生所急也其不得已而言之先生
之憂也其應時績效者先生之幸也記曰天下有道則行有
枝葉天下無道則辭有枝葉觀於先生之言行亦若是而已
余往宦游江右至高安稽求先生爲丞時事謂從異人受祕
書乃棄官歸青田山中覽識天命所在而起故天民所抱持
達可行於天下而後行之類如是文辭云乎哉先生所編又
有多能鄙事若干卷方行人間其占驗象緯諸書先生啓手
足時命其子獻諸朝具在金匱石室靡可得窺云 昔
隆慶六載歲在壬申孟冬陽月上浣同郡後學何鏜頓首拜
手謹敘

太師誠意伯劉文成公像



贊

虬髯電目探天根兮幹地軸扶龍興雲四方以肅以生民休
戚爲憂喜以大道晦明爲榮辱武功旣成而文治不盡其用
者蓋天也耶抑人也耶

孤子仲璟拜贊

英俊下僚曷仕於時莘野三聘仕止乃宜就桀就湯節義奚
虧大哉王佐察物炳幾運籌決勝翊

龍以飛昭回制作文章是忝允爲宗臣爾爾爾爾

工部侍郎莆田彭韶拜贊

誠意伯劉公贊

唯漢諸葛龍臥隆中予家南陽拂濯高風誰其嗣者青田劉
公天人朗朗濟發淵通璿樞星握百怪盤胸蚤識真主間關
義從歛起風雲飛翼應龍決謀定策掃殄群兇中都畱都卜
維崇閔雨雪陽春訃謨則忠蟬翼敝屣茅土胙封債轅之犢
關弧射工孰令魚水齟齬其終鞠躬盡瘁遇異道同鞅掌弗
及瞻拜祠宮犁眉郁離雒誦焉窮綿綿瓜瓞大啓厥宗兆自
南田亦越甌東遺笏舊簪世守勛庸雲霄萬古勒彼景鐘

贊

皇清康熙歲在丁亥中秋月雨浙督學使者南陽彭始搏拜題

重鐫誠意伯劉文成先生文集

督學使者南陽直上彭始搏鑒定

裔孫孤喚元奇重梓

校訂後學東嘉紉莪張 策 樂成青令楊森秀

東嘉艾園谷 誠 東嘉蓀友朱廷荃

芝田璵友張國璠 美成虞肇翁蕃禘

參閱裔孫芝田尚雅 天鵬 成勳 哲臣

刻誠意伯文集引

誠意伯集舊刻於枯蒼凡二十卷首翊運錄次郁離子次
覆瓿集次寫情集次春秋明經次犁眉公集各就篇名統
爲全集其間製作雜陳未可類別兼以歲久刊板遺落字
多魯魚讀者難之獻科爲公鄉人來按畿南攜是集筒中
嘗置几席暇卽頌讀誠不識其涯涘竊謂公勲業垂于史
籍光昭奕代而文章流播縉紳或未免渙漫獻科切懼焉
因哀爲一十八卷少易舊編之次而公之製作始可類觀
爰付諸梓若勲業文章之盛向有確論獻科何足以知之
嘗記四明楊文懿公有言漢以降佐命元勳多崛起草莽

兵甲間諳文墨者殊鮮子房之策不見辭章元齡之文僅見符檄未見開國之勲而兼傳世之文章如公者可謂千古之人豪矣而世或疑其仕元或獨稱其觀象者是猶訾伊尹之五就知周公止於才藝而已不已陋乎嗚呼是可以知公矣

皇明嘉靖三十五年丙辰正月朔同郡後學樊獻科拜識於真定冰玉堂

引言

家文成公著作等身若翊運錄郁離子覆瓿集寫情集犁眉公集春秋明經諸篇次爲全集明初梓行鄉塾成化六年御史戴公錄善本而重鐫之正德己卯郡守莆陽林公刻置里第嘉靖丙辰縉雲樊公來按畿南以是編製作雜陳難以類別少易舊次重刻於真定傳日益盛隆慶壬申侍御豫章謝公按部栝蒼得里第本廼檄郡守建安陳公依真定本翻摹授梓麗水何公縷晰條分校訂獨詳梓行至今廼世變滄

桑不特鈔板無存即成帙亦乏全璧自祖賜郡永
嘉衍余派於郡之新河里家藏一部世奉手澤有志
重刊苦於無力嘗攜見宗鼎讀書孤嶼相與撫卷太
息者久之方丈月川派姪也聞而躍然捐資倡始因
與同志張子紉莪谷子艾園輩暨諸族分再加校訂
命男董理仍復元編統爲二十卷哀成全集付之梓
以公世不敢秘爲一家之私俾天下後世知有先民
典型亦以使吾家世世子孫弗替引之云爾東嘉裔
孫歲貢生標謹識

凡例

一彙編

舊刻翊運錄郁離子覆瓿集犁眉公寫情集各自爲卷
今不以名卷集于一也

一存削

原集舊本今不敢輕爲去畱惟非時製者刪之刊落
無首尾者削不書

一提掇

卷中遇

皇王誥勅恩詔字樣俱空一字別之

一編次

文集先

御書次 誥

詔次 頌表次 郁離子次序 記次 跋說次 箴銘

次 賦騷次 樂府次 歌行次 古風次 律詩次 絕句次 詩餘

卷從其類 以便檢閱 惟古詩卷中 或一題數十首 間附

律詩 則不抽置 別卷從公初意 其傳解長律 僅一二作

隨附 別卷之後省也

一闕疑

卷中魯魚 就所知改訂之義 難強解者 闕如舊本

附誠意伯祠記 碑銘 祭文 叅政敕誥 祭文 銘辭

重編太師誠意伯劉文成先生文集目錄

卷首

像贊

行狀

勅建誠意伯祠堂記

勅賜翊運祠碑記

祭誠意伯文

考功監丞劉璉勅

江西叅政劉璉誥

御祭叅政文

叅政墓碑銘

叅政哀辭 併序

文成公神道碑

第一卷

御製慰書

御名書

又帖

御名書

御寶詔書

皇帝手書

御製平西蜀文

御史中丞誥

弘文館學士誥

誠意伯誥

御賜歸老青田詔書

襲封誠意伯誥券

欽降祭文

贈太師謚文成誥

禮部會議

祖永嘉郡公誥

祖母永嘉郡夫人梁氏誥

父永嘉郡公誥

母永嘉郡夫人富氏誥

妻永嘉郡夫人富氏誥

襲封誠意伯并夫人誥

瑞麥頌 并序

祀方丘頌

平西蜀頌 并序

甘露頌 并序

文成公謝 恩表

閣門使劉仲璟遇 恩錄

谷王府左長史劉仲璟傳

誠意伯劉瑜謝 恩表

第二卷

郁離子九篇

第三卷

郁離子九篇

第四卷

序四十四篇

第五卷

記三十七篇

第六卷

跋九篇

說七篇

問答語四篇

拙逸解

雜解附辨三章

文二篇

第七卷

銘八篇

梅頌 并序

箴六篇

贊二篇

碑銘二篇

墓銘八篇

副都元帥石末公德政頌

儼連珠六十八首

第八卷

賦八篇

騷十五篇

第九卷

古樂府一百二十八首

第十卷

古樂府一百四十三首

第十一卷

歌行五十四首

第十二卷

四言古詩二十二首

五言古詩一百二十二首

第十三卷

五言古詩二百一十八首

第十四卷

七言古詩四十一首

第十五卷

五言律詩四十六首

附五言長律二首

第十六卷

七言律詩二百四十二首

附七言長律二首

第十七卷

五言絕句十七首

附六言絕句三首

七言絕句二百五十一首

第十八卷

詩餘二百二十三首

第十九卷

春秋明經二十篇

第二十卷

春秋明經二十一篇

